

**Ilaqtariinnermut Peqqissutsimullu Naalackersuisoq  
Landsstyremedlem for Familie og Sundhed**

Inatsisartunut ilaasortaq  
Astrid Fleischer, Demokraatit  
-/maani

**Inatsisartunut ilaasortap Astrid Fleischer Rexip Demokraatineersup  
inatsisartut suleriaasianni § 36, imm. 1 naapertorlugu apeqqutaanut  
allakkatigut akissut.**

**Peqqissaasunik sulisussanik pissarsiniarneq pillugu.**

Inatsisartunut ilaasortap peqqissaasunik sulisussanik pissarsiniarnermut  
soqutiginninneranut qujavunga.

Peqqinnissaqarfimmumut peqqissaasunik sulisussanik pissarsiniarneq ukiut  
ingerlanerini assigiinngitsutigut pisarsimavoq assigiinngitsunik sunniutilimmik,  
tamannalu soorunami nunani sulisussanik pissarsiniarfiusuni pissutsinit  
sunnerneqarpoq. Maanna peqqissaasussaaleqineq nunarsuarmi tamarmi  
atuuppoq.

Ukiuni kingullerni peqqinnissaqarfimmi paarlatsinik  
paarlattaasussarsiortarfinneersunik atineruleriartorneq aningaasaqarnikkut  
kingunerisanik, peqqissaasoqarnikkut kingunerisanik, sullivimmi avatangiisinut  
kingunerisanik, kiisalu aalajangersimasumik sulisuusut ilungersortinneqarnerannik  
il.il. ilallugu sorpassuartigut nutaamik eqqarsalersitsivoq - tassunga ilanngullugu  
amma sulisunik pissarsiniarnermut tunngatillugu.

Ilaqtariinnermut Peqqissutsimullu Naalackersuisoqarfik Task Force-mik  
pilersitsivoq Naalackersuisoqarfiit akomanni sulisunik pissarsiniarnermut  
tunngatillugu ajornartorsiutinik qulaajaasussanik suliniutinillu sulisunik  
pissarsiniarnermut pitsaasumik sunniuteqarsinnaasunik (akissarsiatigut  
pitsanngorsaanermit sulisunullu isumaqatigiissutit naapertorlugit sulisuusunut  
pitsanngorsaanermit allanut kackersuunneqassanngillat) siunnersuuteqartussanik.  
Sulineq 2009-mi maajimi naammassissangatinneqarpoq. Tamatuma saniatigut  
Peqqinnissaqarfimmik aqutsisut sulisunik pissarsiniarluni suliniarnermik  
sukumiinerulersitsereerput.

Inatsisartunut ilaasortaq Astrid Fleischer Rex makkuninnga toqqaannartumik  
apeqquteqarpoq:

1. Peqqissaasunik assigiinngitsunik sulisussarsiornermi nunat suut  
ilaatinneqarpat?
2. Peqqissaasunik sulisussarsiornermi nunanik allanik ilaatitsisoqalissappat  
Naalackersuisut nunat sorliit piukkullugit eqqarsateqarpat, tassa  
apeqqummi 1-imut akissutigineqartut saniatigut?

10.03.2009

Postboks 260  
3900 Nuuk  
Oq/tel +299 34 50 00  
Fax +299 32 55 05  
IPN@gh.gl  
www.nanoq.gl/

3. Nunat allat sorliit naalackersuisut assigiinngitsunik peqquteqartumik peqqissaasunik sulisussarsiorfigissallugit kissaatiginngilaat?
  - a. Taamaassimassappat Naalackersuisut qinnuvigineqassapput suna tunngavigalugu peqqissaasut nunanit taakkunaneersut Kalaallit Nunaanni sulisinnaanissamut naammattunik piginnaassuseqanngitsunut nalilerneqarnerat sumik tunngaveqarnera soq nassuiaqqullugu.

Naalackersuisut apeqqutinut akissutaat:

1-imut) Napparsimasunik paarsisunik assigiinngitsunik sulisussarsiormi nunat suut ilaatinneqarpat?

Suliaqaqatigiit atuagassiaanni tusagassianilu ullormut saqqummersartuni annonceliisoqartarpoq taamaalilluni Nunatsinni, Danmarkimi, Sverigemi Islandimilu peqqissaasunik pissarsiortoqarlularluni.

Taamatuttaaq atorfiit allagarsiussat internetimiipput tunngaviatigullu nunarsuarmi tamarmi atuarneqarsinnaallutik, annonceliisarnerli pingaarnertut Danmarkimut Nunanullu Avannarlernut atuutsinneqarluni.

Siusinnerusukkut aamma Savalimmiuni Norgemilu annonceliinikkut peqqissaasussarsiortoqartarpoq. annonceliinernulli akit pissarsianut naapertuussimangillat.

2-mut) Peqqissaasunik sulisussarsiormi nunanik allanik ilaatitsisoqalissappat Naalackersuisut nunat sorliit piukkullugit eqqarsaateqarpat, tassa apeqqummi 1-imut akissutigineqartut saniatigut?

Naalackersuisut nunat avannarliit saniatigut nunanit allanik peqqissaasunik sulisussarsionissaq periarfissaqarsoraat, peqqinnissaqarfilla aqutugalugu suliffeqarfiit akilersillutik peqqissaasunik nunat avannarliit saniatigut nunanit allaneersunik pissarsiuussisinnaasut oqaloqatigalugit.

Aningaasaqarnerup, suliatigut piginnaasat peqqissaasullu taakku akuerineqarnissaannut tunngasut, kiisalu nunatsinni peqqinnissaqarfimmi ullormit siullermit peqqissaasutut sulisinnaanissamut oqaatsitigut piginnaasat ataqatigiisinneqarnissaat siunertaralugu sulisussarsiuussisarfinnit taama ittunit saaffiginnissutit Naalackersuisunit ingerlaavartumik naliliiffigineqartarput.

Soorunami nunat avannarliit saniatigut peqqissaasunik nunanit allaneersunik atorfinitsitsisarneq pillugu nunani avannarlerni allani misilittakkat naliliinerni ilanngunneqartarput.

3-mut) Nunat allat sorliit naalackersuisut assigiinngitsunik peqquteqartumik peqqissaasunik sulisussarsiorfigissallugit kissaatiginngilaat?

Aatsaat peqqissaasut ilinniarsimasut nunanit allaneersut nunatsinni akuerisaanissamut piumasagaatinik ilinniarsimanikkut

naamassinnissimangikkaangata Naalackersuisut soqutiginnineq ajorput (akuersissummi inuup peqqissaasutut atorfininnissaa peqqissaasutullu sulisinnaanera tunngavilerneqartarpoq).

Nakorsaq peqqinnissaqarfimmik nakkutilliisoq peqqissaasunut nunat avannarliit saniatigut nunanit avannarlerneersunut utaqqiisaasumik akuersissuteqarsinnaavoq, ilinniarsimanissamik piumasaqaatinik naamassinnissimappata. Tamatumani ukiup affaani misiligutaasumik atorfeqarnissaq, kiisalu misiligutaasumik atorfeqarnerup naanerani peqqissaasup suliatigut piginnaasaanik, attaveqateqarsinnaanikkut kulturikkullu pisinnaasaanik naliliinissaq piumasaqaataavoq. Taamatut pisinnaasaqarnissaq peqqissaasup namminersorluni sulisinaanissaanut piumasaqaatinillu peqqissaartumik ilumooriaqqissaassuseqartumillu malinninnissaannut pisariaqarpoq. Taamaaliornikkut peqqissaasut suliatigut piginnaasaminnik naammaginartumik qaffasissusilimmik sulinermi atuisinnaanertik takutissavaat. Aatsaat tamatuma kingorna nakorsaq peqqinnissaqarfimmik nakkutilliisoq ataavartumik sulinissamut akuersisinnaavoq.

Taamatut piumasaqaateqarnikkut innuttaasut suliatigut naleqquttumik sullinneqarnissamut pitsaasumik sullinneqarnissaat isumannaallisaavigineqarnissaallu qularnaarneqassaaq.

Ikinngutinnersumik inuulluaqqusillunga

Naja Petersen

Ilaqutariinnermut Peqqissutsimullu Naalackersuisoq